

frequentia etiam superat, in ea prorex aliquis sedem obtinet ipso prorege Provinciae nihilo inferior, quatuor enim Provinciarum curam gerit, atque inde denominationem, Kiangsi nimirum, Huquang, Fokien, & Quantung, non quod illae ipsi omnino pareant, sed quod ex singulis binas urbes finitimas gubernet. Ratio autem hujus proregis extra ordinem constituendi fuit, crebra latronum per hanc regionem infestatio: olim enim hic locus latronibus scatebat, & quum facilis in diversas Provincias pateret fuga, (hic enim quatuor Provinciarum montes fere in unum conveniunt,) haud ita facile erat eos deprehendere; eam ob rem constitutus est prorex singularis, (eo quod plurium capitum plerumque variae sint sententiae, nullaque consensus,) ablatis ab unoquoque prorege Provinciali binis urbibus, is militaribus instructus copiis, exactisque statutis excubiis, salubri consilio consilia ac vires latronum reprimat; pro stipendio militum alendorum illic publicum telonium institutum est, mercatoribus lubenti animo persolventibus quidquid id est oneris, ut a latronibus tuti, sine metu sua peragant mercimonia.

Pons navis.

Pontem longissimum navibus, quas ad centum & triginta, nisi fallor, numeravi, incumbentem habet, qua ad urbis moenia utriusque fluminis sunt confluentes; naves omnes ferreis catenis sibi mutuo adnexae sunt, super impositae trabes, crassique asseres pontem sternunt; in ipso ponte telonium est: una enim ex navibus ita est constituta, ut facile aperiatur, claudaturque pro navium transitu, ubi portorium solverint. Pulcherrima etiam, ac praeter reliquis magnifica turris visitur ad ripam fluminis prope Sinfung civitatem, (quam ad imitationem septizonii Severi octogonum novizonium soleo appellare) ex sectis lapidibus ad ingentem altitudinem erecta est; verum quia huic similes alias alibi descripsi, nihil hic de ea amplius addam.

Nomina antiqua.

Olim haec regio U regum fuit, paulo post Jue, inde sub Cina familia Kieukiang dicta, sub Hana Changcan, hodiernum nomen impositum a Sunga familia haecenus retinuit. Urbs intus ac foris complura praecelara aedificia continet, quae hic sigillatim referre nimis longum foret, inter ea duo magnifica Heroum fana sunt: duodecim in montanis plerasque locis regit civitates: 1 Cancheu, 2 Utu, 3 Sinfung, 4 Hingque, 5 Hoeichang, 6 Ganyuen, 7 Ningtu, 8 Xui-

kin, 9 Lungnan, 10 Xeching, 11 Changning, 12 Tingnan.

Sunt in flumine, per quod hic descenditur, egregia molendina, ex quibus facile Sinarum ingenium ac industriam colligas, ad eum fere modum, quo in Italia ac Germania, constructa sunt; iisque etiam ad aquas ex fluminibus ad oryzae campos deducendas utuntur, ingentibus nimirum atque altissimis rotis, una cum vasculis adnexis, aquarum vi atque impetu elevatis & circum axem agitatis, quae molae ut plurimum hic non uni alicui affixae loco sunt, sed mobiles, una cum navibus circumferuntur, ac quo volueris pergunt, moluntque.

Tiencho mons ad urbis Orientalem partem est, in quo noctu lux veluti accensorum carbonum apparet: quidam serpentes esse putant, aut araneos; quos fabulantur pretiosos quosdam, quos capite gestent, evomere lapillos, eosque denuo sorbere.

Prope Sinfung ingens ac densissimus est mons Hiang, rarioribus medicamentis ibidem repertis nobilis, in eo numerati nonaginta altissimi vertex. Prope Ningtu est Kincing mons, ex laudatis in Tausu libris ordine quintus supra tricesimum. in his ac vicinis montibus numquam alias visas belluas, hominesque omnino sylvestres, ac ferino ritu ibi vitam degere ajunt Sinae Geographi.

Can flumen originem habet ad ortum Xuikin civitatis, inde fluens versus Septentrionem haud procul ab urbe, cui nomen dat, Chang fluvium excipit; hic Chang fluvius oritur ad occasum Nangan, in confiniis Huquang provinciae: qui duo fluvii in unum coalescentes, totam fere Provinciam mediam secant, superataque metropoli Poyang lacum augent.

Prope Lungnan tria concurrunt flumina, nimirum Tao, Lien & Vo.

Decima tertia Urbs

N A N G A N.

Maxime Australis ultimaque hujus Provinciae est Nangan urbs, cujus moenia Chang fluvius radit, unde emporium est frequentissimum; quidquid enim mercium vel Quantung ex tota Sina, vel ex Quantung in reliquam Sinam devehitur, ad hanc urbem appellere & exponi debet: quippe superato isthmic monte, collocantur merces in navibus, ut secundo flumine

Emporium frequens.